

1 4
1544
160



44
1544
160

昭和十八年
十一月十日
購永

羅江縣志卷六

邑人李調元兩村稿

北鄉上

翠望亭在城北一里唐元宗入蜀縣令造亭於此祖侯
王人呼為接王亭遺址尚存 名勝志

宋陸游羅江驛翠望亭讀宋景文公詩撲馬征塵拂
不開高亭欵帽一徘徊蜀山地暖稀逢雪閨歲春遲
未見梅陂水近人無驚下烟林藏寺有鐘來宋公出
牧曾題壁錦段雖殘試剪裁 劍南集

按翠望接王志言遺址尚存今似無考只有朝天

羅江縣志卷六

羅江縣志卷六

邑人李調元雨村稿

北鄉上

翠望亭在城北一里唐元宗入蜀縣令造亭於此祗候
王人呼為接王亭遺址尚存名勝志

宋陸游羅江驛翠望亭讀宋景文公詩撲馬征塵拂
不開高亭欹帽一徘徊蜀山地暖稀逢雪閨歲春遲
未見梅陂水近人無鷺下烟林藏寺有鐘來宋公出
牧曾題壁錦段雖殘試剪裁劍南集

按翠望接王志言遺址尚存今俱無考只有朝天

寺爲 國朝所建或其故基歟朝天亦接王意也
又二里有企僊亭乃車岩上昇處宋師堯俞作記各勝志

按萬歷總志二里有三清觀今亦無考或企僊也

北寺縣北四里許卽古潺亭廟也建於明末今梁上有
大明崇正十三年歲次庚辰二月初一日甲申吉且捐
貲功德主國學監生邑人余賡鼎建三十五字尙存

縣有潺水出潺山水源有金銀礦洗取火合之以成金
銀潺水歷潺亭而下注涪水水經注

晉於梓潼水尾萬安故城置萬安縣李雄之亂移就潺
亭太平寰宇記

唐開元二十四年立潺亭碑文字磨滅尙有潺亭二字

碑陰有宋邑令太常博士宋嘉彥書舊圖經

宋嘉彥重修潺亭廟碑記嘉祐三年予始著邑事明
年訪古跡而潺亭廟有遺址存焉東南百步有碑仆
於民田中其潺亭二字亦不復睹稽其址歷數百年
廟與碑俱廢是神之祀於民者不亦闕乎且俟因官
之美材而復廟貌之未幾里民請自修之次年廟成
秋大旱晨禱而夕雨自是潺之民益靈其神相與輓
碣立之祠下時嘉祐五年也名勝志

本朝王士禎羅江驛雨故縣也今省入德陽前旌已

拂鹿頭關風雨勾留不肯開何處行人最愁絕潺湲亭下水潺湲

去潺湲亭五里官堰山古名雲蓋山山背石刻行書雲蓋仙峯四字甚遒勁

舊縣志

唐令白大信縣北五里有芒岡堰引射水溉田入城永徽五年令白大信置

唐書地理志

永徽高宗年號

韋德羅江令縣北十四里有楊村堰堰引折脚水溉田貞元二十一年令韋德築

全上

志云今縣境有芒江泉水玉女馬山迴龍乾河堰

讀史方輿紀要

瀾水河俗名冷水河自西北由安縣河壩場混江鎮分

派由羅江野人山入境離城三十五里由石皮灘又過

石坎至獅子院東流同乾河與瀾水河合流作三堰至

北寺前與濘江合流波流滌洄如羅紋故名羅江由東

門外轉南二里合芙蓉溪水合流至三輛車又十五里

至斜灘河又十里至潛子口出口至中江縣下流

乾河城西北三十五里亦自安縣發源由彰明旱壩又

至安縣觀音壩入羅江境離城三十里過石坎灌圍堆

壩田至獅子院與瀾水合流同歸羅江至潛子口入中

江芒江堰即乾河水也

綿陽河縣西北四十里自茂州牛心山發源經天池大壩至綿竹縣東北綿陽口分數派西一支灌綿竹十餘堰東一支由河壩場南流入羅江境為乾河又中分一派經野人山西分一支灌德陽柳梢堰其綿陽河正流漑彰明穿山堰又灌羅江玉女堰出紅砦山口灌畧坪村田又為紅砦天池二堰又東入羅境為後壩堰又灌德陽茅包堰又灌羅江麻山堰南由德陽境下流

舊縣志

按綿陽江即蜀都賦所謂浸以綿洛也蜀地名綿皆因之有誤作沔陽非也沔在漢中

黑水在羅江西北自安縣南流入境下流會於漢州之綿水五代時董璋破西川兵於黑水遂克漢州是也

讀史方輿紀

按古今地輿諸書惟本朝顧氏讀史方輿紀要最為荒謬無徵如引黑水在羅江西北自安縣南流入下流會於漢州之綿水而以五代時董璋破西川兵事為證不知綿水與雒水並趨而下合為渝水即巴水也何曾回到漢州再往下流又不知漢州何處飛來黑水此非大謬乎夫禹貢所謂華陽黑水惟梁州所包甚大以在華山之陽華山屬雍

州古者封域合梁於雍是也黑水出漳臘潘州界今屬夷地是為岷江之始水自汶山下過猶河水之遠崑崙也又一派入滇而出金沙江流入馬湖江與汶水合今之敘瀘界瀘即黑也諸葛亮所云五月渡瀘即此也所謂四川者即岷瀘維巴四水也岷水自綿州而下瀘州自雅州而下雒水自漢州而下巴水自重慶而下是黑水與四水久已各入四支趨入于海矣安得在羅江小邑之間尚徘徊水迴來往穿挿哉顧氏又引章溪營城西北有黑水即古翼水源出梁州生番寨亦南由茂至安入羅

蓋見水黑即稱黑水皆黑水之小者也水黑約有四一漢志符縣有水出犍為南廣縣符關山北入江此符縣黑水也又黑水出漢中南鄭縣北山諸葛亮殘云朝發南鄭暮宿黑水此南鄭黑水也二黑水出羌中南通典扶州尙安縣有黑水此尙安黑水也四崇慶州西北有黑水元一統志云源出常樂山石皆黑此崇慶黑水也皆非梁州黑水行水金鑑韓汝節謂梁州別自有黑水從夷地分流千古卓識而顧氏區區指其一為梁州黑水誤矣平池寺縣北十二里雍正年比丘盛果修前有平池今

湮乾隆年間如秀重修

如秀族人曾同叔
化榭新浙普院

雲龍寺縣北十五里元張無知剏明釋智寧重修有碑

明吳士遷重修雲龍寺碑記按羅志北十里許有雲

龍寺山峯聳翠雲霧龍盤羅之第一禪林也先是至

元庚午敬菴張公無知自龍山來鍊性於此廼建觀

音殿凡三楹其徒德暹復宏廓制世鉢相傳迄明嘉

靖則二百有餘歲也歲久殿宇漸次頽敝觀風者多

惜焉羅僧智寧者姓劉氏甫八歲性恬靜厭囂塵杖

錫遊雲龍者幾六十載勵行精苦真能絕俗士大夫

咸奇之且積錢穀若干藉是養性益力一日謂磐溪

子曰異哉古今之不相及也夫寺吾之禪家也敬菴

剏之德暹述焉而吾坐待其敝於二師有餘愧也縱

師不咎予將不為山靈愧乎而况吾之所積者將何

用也廼捐所積鳩工取材斷勵甃石今年三教殿成

明年祖師殿成又明年天王殿觀音殿禪堂成復建

僧舍二三十所廼裝塑天王廼塑伽藍廼塑祖師頽

者以振敝者以修圯者以興肇自嘉靖癸未迄今已

亥告成制度宏遠煥然改觀焉而寧則不自以為功

也羅士大夫徃榮之因請記於磐溪子磐溪子曰夫

寺僧之萃也夫財人之心也方今遂財以自侈者環

天下孰肯捐所愛以遺人哉自非吾儒之灼見道體者鮮克有此今寧以墨者流而能如是其殆墨名而名儒行者耶豈天欲斯寺復見雲龍之盛乃假寧以重修之耶母亦敬菴蟬蛻以顯其異而後生寧以濟厥美也况寧安閑厚憇淡寂禪林入定法華趺坐松月朝夕乎六祖之論三觀之理固不但事師以禮事親以孝爾也觀彼之怪誕慢訑以惑世者其賢不肖何如耶謹拓諸石以志重修之意抑以表工人之功當垂於不朽也是為記嘉靖十八年歲君巳亥暮春之吉磐溪山人吳士遷子安撰奉政大夫知湖廣茶

陵州事前已卯鄉進士邑人吳士達篆蜀府典膳所典膳邑人吳士達書

雲龍山扁擔灣李石亭公祖塋在焉有李氏宗祠右有美實公神道碑左有英華公神道碑

李化楠

俱再玉嘉填諱不重出

祠堂記古者立祠堂為四龕以

奉四代神主高祖尊祖祖父也始祖之祭始自程子雖朱子有似禘之疑然世遠而派別不有始祖一祭無以收族是亦禮以義起之一端也况所謂始祖者以遷居此地及初有封爵者為之非必厥初生民之祖也隨分致祭何僭之有吾家上世不可知論遷居

此地及初有封爵之義則當以美實公爲始祖而厚
公不與焉禮曰別子爲祖繼別爲宗繼禰者爲小宗
有百世不遷之宗有五世則遷之宗美實公則吾先
世之別子也是爲始祖而美實公之長子世世以長
繼別是爲大宗美實公之衆子則各以其長繼已是
爲小宗始祖百世不祧小宗親盡則祧此古之宗法
也故古者子孫繁衍廟制非一有禰之廟自己之兄
弟子姓咸屬焉有祖之廟自父之兄弟子姓咸屬焉
有曾祖之廟自祖之兄弟子姓咸屬焉有高祖之廟
自曾祖以下之兄弟子姓咸屬焉有始祖之廟則一

姓之兄弟子姓咸屬焉其爲典也備而其爲制也詳
後世人不思古親親道微生者後輪奐之觀死者無
一瓦之覆匆匆送葬三載除服以爲人子之事於是
焉畢歲時不告飲食不獻生辰忌日置若罔聞則求
其有祠堂不可得又何論乎百世五世之縷別也夫
主必有祧者一定之制而追慕不忘者報本之心近
世士大夫家建立祠堂自始祖以下木主皆設廟中
雖親盡而不祧此其制非古而要爲不忍忘其親之
意吾家祠堂卽用其法正祠三間長房居中其高出
者爲始祖二房居左三房居右各設一龕每一代爲

一階層遞而下所謂禰廟祖廟均於是焉在大宗小宗卽於是焉分庶幾遠有所統近有所宗名分得而支派明子子孫孫皆得以展其孝思矣祠建扁擔灣係徐國玉之業今三房用價買其田地山林而以基址一所竝附近田一畝捐作祠基約同族人起造正祠十一柱三間耳房七柱東西各三間拜廳五柱三間大門五柱三間厨房五柱三間共十八間祠成改扁擔灣爲祠堂灣云

李氏族譜

李攀旺字美實羅江縣雲龍壩人也生三歲而孤母王氏再適同邑李雲卿公隨母育於李值流寇張獻忠

亂人多逃亡時李富於財旣死其僕何勦勦者謂公曰子非李氏嫡而受其財族衆忿甚不去將殺汝公於是歸時年二十三矣至則宗族盡散無一存者公子身無倚隨鄉里二三人走石泉是時賊衆猖獗所過殺傷焚掠殆盡民食無所出強者殺人而食弱者幸以身免則匿跡深山採樹皮草子爲餅充饑公嘗絕食三日夜於空宅中獲一猫燒食之得不死張養心者宋有聯之妻弟也公與有聯同避兵故識養心一日至其處養心召公同食時無碗以瓦片盛肉而已公稍嘗知其味異然不敢明言棄其不見而棄之歸以語有聯有聯曰若輩

素食人肉者奈何食其食乎於是心影成疾腹膨久不愈聞渡夫王五善針灸就而灸之他日又至其家王五夫妻方食魚將盡止餘頭尾見公至則以食公而謂之曰好好有頭有尾子之疾自此除矣由是果愈公在石泉二年值蜀中平定乃歸住河村壩土曠多年田地荊棘中公開荒刈草獨力經營又歷十餘年粗有積蓄始聚妻卽吾祖母李氏也時年四十一矣厥後移居毛家壩又十餘年移南村壩子孫今家焉當時兵燹之後鄉人存者百僅一二而公族屬又無一人在者故前後三遷皆就伴居住未得復業公爲人忠信渾樸不校是

非凡事退讓人有犯者輒語謝之嘗謂人曰吾昔在兵劫中踰越險阻衝冒鋒刃野居露處朝不保暮自分必死今幸賴上天之眷祖宗之靈以有其身得延李氏之一綫吾何求哉吾惟有吃得虧三字可以保身可以遺後願世世子孫守而勿失至於機巧變詐是吾所知然亦羞而弗爲也鄉里以此多之至今稱爲長厚治家以勤富徭役繁重時怠惰者多失業而公未嘗缺乏遇戚黨有急貧者多所周濟以明天啟丁卯年生至國朝康熙庚辰年卒享壽七十四歲以孫化楠貴乾隆十九年賜贈美實公爲文林郎李氏賜贈孺人子三文彪十

李文彩字英華與兄鴻飛公學生狀貌絕類外人往往莫辨束髮受書通大義值時事艱難棄而力耕喜賓客好施捨計田中每歲入蔬布足自給餘悉以餉客遇人方窘急輒設法周濟或代出名立券後雖倍息償無怨悔有譚世民者僑寓村中聞公好善因以急難告公爲代借數十金以應已而譚挈家逸去公設措代還越數年有自金堂來者云譚在其處公置不問其陰德長厚類如此公天性過人孝友純篤兄弟之間歡然無間分居析產時公重自損抑田取其瘠者地取其不毛者謂

少服於是不須更易祖遺舊屋讓歸長房借鴻飛公另自營屋而住居鄉黨侃侃直言爲人排難解紛悉悅服又度量豁達不與人校是非遇有非禮相干之事旁人代爲不平公付之一笑而已晚年喜植花卉尤嗜讀書當天朗氣清時手一編坐北窗下披涼風謂羲皇上人無以過又或寄興江湖則攜斗酒至河干或垂釣且釣且酌放懷自適視人世繁華艷冶如無有也公性仁於愛物而廉於自奉長子化楠遊宦浙江公誠之曰吾家世本布衣今遭逢聖主得叨一命幸矣惟作好官可以報國好官必以清爲主我雖年老粗衣淡飯尙自

不缺無需祿養爾其勤勞王事母沾清白以辱爾祖化
楠謹遵其教不敢忘乾隆十九年 勅封文林郎元配
趙氏 勅封孺人公生於康熙戊辰卒於乾隆丁丑享
壽七十歲子三化楠化樾化樟 同上

羅江縣志卷七

邑人李調元兩村稿

北鄉中

雲龍山北象山有李石亭公別墅名曰醒園額為丹徒
編修王文治書

李化楠山居卽事詩四首有序云買地十畝築室三
楹避俗離塵風景擅平泉之勝背山臨水烟霞繪鞞
川之圖手栽竹木漸成林樂哉斯土自是園廬多逸
興老矣歸田散步獨遊曲折檻欄花爛熳憑高遠眺
迷離村樹屋參差旣適志以安身亦陶情而悅性年

華易逝那有仙藥駐紅顏富貴何時肯對靈山辭綠
蟻本來面目醉裡乾坤僻地無鄰嶺上白雲常在戶
高峯有主天邊明月不須錢登東臯以舒懷橐筆成
韻倚北窻而奇傲薤簞生涼謂我何求只向林園尋
活計於心已足不勞蓬島問因緣爰作小詩以質同
好 何處堪宜著此身園林幽僻絕羈塵鋤荒結就
三間屋便與烟霞作主人 山居非吏亦非仙喜得
名花盡日妍酒罷長吟無一事望江亭下水連天
牽衣直上七層臺眼底乾坤大放開林樹蒼茫村舍
遠白雲深處有人來 看看兩鬢白如絲角利貪名

到幾時願得人皆閒似我常來共對一枰棋 石亭詩集

園中有大石缸養金魚十餘尾缸面坐小石山山上栽
花木數種蒼翠可愛缸上有石亭公石刻詩

山一卷天半落水一勺長不涸上承綠樹陰不見紅
鱗躍春色滿園林亭臺隨地着吾心淡無營吾身欣
有托何須海外覓三山此間便是蓬萊閣

醒園圖重慶太守漢軍朱孝純子穎所畫也朱初為琪
縣令道出羅江曾遊此園後同年編修海寧祝德麟芷
塘復以庚寅偕檢討湖南鄧文泮入蜀典試回京路過

見訪留詩次年予至京補官與朱祝相晤各憶舊遊子
穎遂為繪圖祝首題詠寄回醒園懸石壁間以後題者
甚衆

庚寅四川正主考編修祝德麟題醒園圖詩并序云
歲庚寅奉使入蜀時主人偃臥醒園子穎方守重慶
試事畢迂道訪舊流連竟夕沙竹之勝魚鳥之樂得
周覽焉主人送至金山驛而別途中用工部韻作十
律寄之高下幽曠之趣摹寫畧盡越二載主人來京
師子穎亦以改守山東待覲闕下別筵作畫遠形近
勢如在目前醒園僻在遐陬以主人之賢凡名流入

蜀者莫不至其地至必有詩子穎亦親見者故為景
獨真而松風水月僅付臥遊豈所謂寓意于物而不

留意者耶余既幸斯園之得主復不免今昔之感錄

前詩歸之宿醒園用杜工部遊何將軍山林韻十首

園枕山面流到時天已暝待曉登絕頂騁眺遂
聯轡過南邨登堂拜母而別故備志蹤跡焉 跡滯

三秋後身遊萬里橋黃花明異域青鳥返重霄短李

幽居僻長須奚騎招逢迎欣得主造訪肯辭遙 滅

從聯雙騎天光出郭清溪喧惟祭獺秋老不聞鶯野

爰除瓜架山妻茹菜羹殷勤語楚客何似武陵行鄧

山謂所歷徑途
絕似楚南邨景 林外波聲活潑江別一支叱牛收水

磨呼鴨上陂池徑亂增樵惑巒重獨鳥知只應游展

過荆棘已教披漸近醒園路山寒少雜花插天峯

似象赴壑水如虵鱗鬣看松老梧椿想澤賒他年長

千尺喬木識君家園依雲龍山為址其旁曰象山李氏祠墓所在繞舍萬松皆尊甫所

植柴荆無洒掃今日逐江開堂構方求木兩村方謀與築承先

志也寒暄異望梅楊懸徐孺至忝具范卿來為同門前

路客誰損綠苔握手讀詩集高詞源湧泉思親新

涕淚懷友舊纏綿唱和聯諸謝評詩待老錢兩郵向

前香樹為翁所極賞凋零雙桂後若箇長西川楊升菴雙桂堂在新都今已廢

飲我郭筒酒春醪麩米香庖烟衝眼黑園菜益津涼

選忘兒能誦杯乾婦久藏乘醜思振策下界鬱蒼蒼

熹微尋石磴曲徑半臨池真欲謀笄簪偶來到接羅

人家團竹色秋水瘦魚兒早識溪山美應令畫手隨

雪嶺明晴旭花驄撥亂雲碑前重墮淚身後但遺

文經其尊甫祠堂拜母衣冠肅論交輩行分令弟鼎元於是科獲雋故歲之

童時釣遊處指點復紛紛一飯南村舍臨歧意若

何別人甘語少看客比鄰多敢忘對床約難為行路

歌回頭問野老使節幾經過壬辰重陽後三日

調元和憶昨金山驛銷魂似霸橋獨歸聽夜雨相望

隔雲霄仍對烏犍侶難為白鶴招今宵燈送喜萬里

素書遙 開緘鯨掉尾瘦字逼波清已列班中鷺猶
思谷口鶯交寧甘似醴詩却和於羹此夕渾忘寐持
吟徹曉行 病抱年來久逢迎總強支原非揚子宅
誰問習家池鋤草憐蟲訴移花許蝶知自經君染翰
景色競紛披 三秋纔謝菊二月又飛花忽漫逢江
雁因嗟赴壑蛇十詩寧易得千盞不難賒天意憐孤
寂風吹過我家 人到晨星後天教積霧開諸昆非
軼轍座主是歐梅一夕成佳話千秋此偶來但看攜
手處三徑未生苔 留客斟清聖烹茶瀉碧泉更長
眠未穩語短意殊綿香漬雲垂紙燈明夜博錢顛狂

聲不細一日遍三川 高軒來過處草木有清香衣
帶巴江暈牀分楚簟涼詩緣聽雨作書借看雲藏尚
喜顏皆舊毋須歎老蒼 吾家潺水出柴屋正臨池
天使回旄節主人方接羅擁門窺野客送榼遣諸兒
却悔分張日車塵失計隨 並馬送君去清江水蹙
雲山川供別賦風雨助論文棧閣程空望綿州路早
分當時腸最斷歸緒淚紛紛 寫罷鸞牋寄茫茫奈
若何劍南鴻字少輦下故人多難忘青燈伴慙賡白
雪歌至今明月夜猶夢使星過 小園
順天府府尹南滙吳省欽君才美如蜀錦段過歸奉

寢淹三年墓田丙舍計粗就來枕畫省香爐烟雲龍
山旁象山麓潺江東遠鳴濺濺小園雖小衍先澤漁
父信宿時夤緣一樓一閣置帖安一花一藥羅芳鮮
亦知人情重懷土狼驚鶴怨終由天笑磬生絹乞能
手朱老真似南鄰然古來行軍著要約馬廐往往堪
平泉卽今松維事撻伐輸輓例藉租庸錢君爲蜀人
朱蜀守時蠟兩屐張長筵想見雪嶺戍天外千里貼
席忘戈鋌予於是園欠親歷巖居川觀寧非仙掉頭
不佳入京洛山水之福將唐捐賴此畫本秘行篋玉
蟾蜍淚流微涓醒園獨醒太無賴豈若買醉長安眠

禮林他日大於斗過訪我亦浮巴船

刑部郎中桐城姚鼐蜀山西自蠻夷之中來千仞萬
仞雪崔巍劍門山南錦江暖桑麻沃野當中開綿州
綰轂劍關口白沙碧水環杉柳吏部平生居此州萬
株種松百瓶酒錄詩空谷感英靈投轄使驛招賓友
天下傳君此醒園君今却出劍關門我見君顏長不
澤君道思家歸未得况復西山有畔夷軍與大渡河
西北湔氐山密豺狼驕又傳兵馬乘繩橋丁男盡力
助輸輓園林坐見生蓬蒿前夕渝州使君至看山徧
歷印驪地籌邊經國意何長就君傳出西南事爲君水

竹貌平分先貌松維雪嶺雲偃卧信知魚鳥樂明年
定罷殿前軍

侍讀學士青陽王懿修卜築新堂綠野如芙蓉溪畔
謫仙居家聲試朔平泉記手澤猶存種樹書長愛清
閒對琴鶴未訪磊落注蟲魚名園自是廻翔地辛苦
貽謀慶有餘 仙才未合住岩阿數畝園如傳舍過
宦跡共瞻星使遠文心應貯錦囊多春風海外新桃
李素業山中舊草堂 山日堂陰真濟美胡良遙接潞
河波

穎州六

章信有之使君圖

畫翰林詩

園醒亦宜花木

泉亭千里

山亦有烟霞癖猿

鶴同君怨別離

編修歙縣程晉芳重慶太守能詩復善畫昨來與予
剪燈話乘閒乘雪會上峩峩最高頂俯矚大千銀世
界嶺無平勢澗無聲凍雀冷雲為一派凌虛抗手欲
招真不信人間多芥蒂談神說鬼無此瑰且奇使我
聆之起衰憊因覽其近詩蕭瑟空濛具得山水力醉
後拈毫繪醒園乃是雨村所促逼雖經促逼饒遠神
羅江亦有峩峩春斜亭曲沼歸方幅瀉入平江月一

輪依巖作屏植木如錦丙舍柔柔熟丹甚清泉白石
自惺惺暢好於中圖快飲奚以獨醒爲自命狂特甚
霜猿叫更寒際痒墮葉鏗鏗警秋枕皇然遽然炊未
飪斯境可稱無上之上品太守懷蜀子憶家眼中筆
底開烟霞此時蓉溪芙蓉白於玉問君何苦留京華
籬門盡被松遮却空際描摹難捉摸後人讀書羨遭
逢詩家流爲詩家作

戶部主事會稽吳璜楨林籠竹夾空垣中有臨江舊
業存彷彿翠屏過細雨荷鋤閑立聽吟猿 翰林奉
使詩曾和太守來遊畫擅長好貫郵筒多酌我當筵

一效次公狂

翰林院庶吉士德清陳墉羅江山水清且妍浮空一
碧通雲烟雲龍之峯勢突立俯瞰衆壑如隨肩芙蓉
溪水環其前清光似練涵長川羣巒倒影落明鏡恍
睹玉女高鬟懸雨村卜居蒼翠間登臨縱目千山連
峩帷暮招西嶺月把酒曉挹峩嶻天搗來催程赴日
下山靈應笑奔塵綠草堂風色定不改特乞好手圖
林泉輕風縈江天漠漠微雲入樹山娟娟林亭石室
互虧蔽畫中彷彿桃源仙京師八月秋氣鮮高槐雜
樹鳴涼蟬明窻畫靜拂絹素對之如泛書畫船我思

茲園歷已久前人作室基開先當時經營手澤在詩
篇幾處曾題鑄龍門晉謁今幾年古杭風月吳山偏
墓田旋見生宿草西望蜀道悲啼鵑安得驅車來古
綿相從鄴架披遺編興來更着上山屐高巖一枕松
風眠

調元題醒園圖有感六首車家山下老農夫走上長
安十二衢昨夜鄉愁眠不得呼燈起看醒園圖自分
途窮命裏該君平不必太驚猜虎頭不是封侯相欸
段他時歸去來每到花開躑躅頻故山不見與誰春
生憎一幅桃源畫付與漁郎去問津再向天涯理客

衣回頭三十九年非蓉溪春色花如錦不為萼鮪也
合歸煩惱詩人二月天長安買醉日高眠不須怪我
朝參懶夢裏醒園只枕邊故山茅屋傍雲龍欲寄新
詩再拆封寄語兒童牆角外明年添種幾株松
醒園梨樹最多青黃二種約二百株皆先君手植

調元梨園遣興二首笑對青山曲未終倚樓閒看打
魚翁歸來只在梨園坐看破繁華總是空生涯酷似
李崆峒投老閒居杜鄩中習氣未除身尚健自敲檀
板課歌僮 石刻

天然牀大如廣厦瓊瓏剔透擅一園之勝即先君石亭

公箭亭所坐牀也臨江露置風日無損遊者皆登焉
謂元詩序云天然牀古栢根也昔先君應羅江令楊
古華聘請修奎星閣取材於東山有栢高二千尺大
四十圍霜皮溜雨不知爲何代物中梓人選因伐之
以其身爲棟而棄其根爲薪先君惜之謂古華曰此
可斲爲牀也遂欣然送之掘及九仞乃得傭百夫撐
之溯江昇至醒園除其沙礫剝之剔之稍加修飾枚
枒蟠結百竅瓊瓏盡作龍鳳龜蛇之狀截而平其頂
登之能容八人可坐可眠有若生成故曰天然牀其
廣一間屋不能容故置於箭道以芴亭覆之率爲風

雨所拔然根堅於鐵故雖風日亦不能剝蝕也因於
臨江安置作歌以記之云綿州奎閣齊雲霞建者楊
侯字古華當時伐木十選一兩川斫盡仍三巴就中
先子實首事古栢輪囷半封記忽與楊侯登東山黛
色參天互驚視細者爲楠大者柶乃惜其根乞作牀
自從攆至醒園後夜夜玉衡星有光斲成縱橫皆一
丈龍鳳龜蛇形各像犬牙相錯虬文蟠畧加修飾非
由匠不須簣第不須茵磨洗瑩如楚篔簹凉天若徙
北窻卧清風定認羲皇人我聞牀以栢爲貴素栢蹙
栢皆稱異何況人棄我取之資費無多豈非瑞所怪

直局脚微分釘爭金鐵前朝聞莫教又夢玉堂去夜
中催撰牀婆文嗟余須髮雖未皓歸來宦興跡如掃
安得此牀化黃楊高枕吾廬睡無蚤琉璃瑪瑙猶不
題况又萊杞與管蔡惟此先人手澤在堪與青蓮七
寶齊不願跣跣不願坐但願醉來此間卧不妨露頂
看青天一任浮雲太虛過
由醒園左手而下卽康家壩也縣北三十里有觀音巖
調元觀音巖重修大殿記觀音巖本名白石巖在北
鄉三十里之康家壩前此未有觀音之名也乾隆辛
酉秋驟雨淋漓山崩石裂雷轟電擊忽從霹靂光中

而觀音石像出焉是月先君石亭公卽中鄉試三十
六名附近居隣皆以爲神遂以名巖遠近禱者有求
輒應以是通都大邑輻輳而來而每逢二月十九日
爲觀音誕辰乞靈報賽者畢聚此日爲之酌神演劇
其會之大幾與二月初三七曲山梓潼會等蓋綿州
之第一禪林也顧巖逼巨石峭壁插天建殿不易從
前開山和尚祥喜嵌巖建置大殿添設東廊閱旣久
飛瓦墮落殿頗損壞今年七月天雨連綿山水陡發
巖爲崩裂遂將大殿壓倒兩間而東廊亦傾圮其半
道姑趙復坤念無以妥神居也爲之惻然思重修之

更建玉皇樓於三層之上而力薄不逮不無望於十方之施主為之請序於余以倡之余思觀音之神起於南海顯於西蜀化七十又二之身無不普照遍三千有奇之國共荷慈悲而獨顯靈於吾土此尤居民之太幸也求福者神無不報之矣而顧使神居不爰可乎乾隆五十二年冬月上浣記

調元遊觀音巖何年霹靂擊鐵壁混沌乾坤忽中裂風雨號呼山為搖普陀飛賜一靈石從此文運吾家開聯翩三鳳齊飛來天荒畢竟須天破五丁終不如五雷

鵝鴿寺縣北二十五里余舊讀書處

調元試畢復歸鵝鴿寺詩歸山重掃舊書床一路寒山木葉黃游浙有師皆老宿歸川無試不高庠滿窻已見蛛懸網翻益先看鼠自忙一秀才回詩亦貴吟箋纔寫有人藏補歲考例附三等時亦附高等學臺有三年始見一秀才之語

金頂山縣北二十八里頂有古松元明間物也

李化楠詠金頂古松詩天上何人下碧霄千年怪叟在山腰雲為翠蓋身全露風撼蒼枝影不搖老鍊龍鱗經歲月長揮塵尾絕塵囂幾回佇立江干望滿耳秋清早晚潮

調元雨中望金頂山詩一山孤立衆仙宗盤繞青螺
萬萬重雲裏長疑披絮帽雨中偏似着輕容人言海
內無三島我道村中第一峯倚得孤松喚金頂問他
可也受秦封

馮家菊月峯山縣北三十里有文昌宮人稱上梓潼以
南村爲中梓潼圍堆爲下梓潼相去俱七八里每年二
月初三文昌誕日二處並賽士女奔覩焉

李化楠重修月峯梓潼宮碑記馮家菊有山曰月峯
在羅江縣北三十里雙巒特出峭壁嶙峋攝衣而上
登其巔則河村南村之烟戶歷歷可數焉蓋一邑文

風所薈萃也上有文昌宮爲士子瞻拜之所創造不
知何時明末兵亂委於灰燼有志者議修之不果康
熙壬午庠生范延湄刈草爲菴讀書其中慨聖靈之
未安文教之未光乃與明經陳君獻三招募衆財莊
嚴聖像兼修樂樓一座迄於今數十年矣風雨漂搖
木朽蠹生加以乞兒輩盤踞於中日散夜聚或拆毀
墻壁或污穢殿庭以致愈加荒涼陳君自擊心惻以
爲坐觀其敗罪將有歸爰倡首刻呂鳩王重修去其
朽腐易以良材又於正殿旁接修偏房二所前修拜
亭三楹亭下砌石爲臺中置一門懸於巖畔以時啟

閉擇醇長者鑰之遂煥然為兩村之冠焉是役也始
自庚午冬越辛未夏不一年而成其間之募眾捐貲
者固多而陳氏之父祖孫宣力為尤多帝君之靈
從此其永妥矣而今而後將使兩村之人以時瞻拜
入門生敬追維孝友之訓益深報本之思當必有魁
梧傑出之人以為文教先是又山靈之秀氣所鍾而
亦即帝君之仁澤所覆育於無已者也
由醒園右手而下即團堆壩河也有文昌宮人呼為下
梓潼在縣北三十里
調元二月三日團堆壩文昌宮觀劇見葉贊之天

相毛殿颺德純兩秀才携尊而至歡飲至暮

故友携尊枉駕過一龕同佛聽笙歌君能有酒謀諸

婦我喜無殺得刺婆蜀人謂鱸為刺婆魚古寺僧稀松葉少戲

場人散蔗皮多甘蔗冬窖春賣兒婦喜噉之戲場為甚多嚼其汁而棄其皮與渣焉

十年不到團堆壩白髮看看奈老何

又五里有寶豐寺有牛王會

又八里至南村東山有東嶽廟皆明初所建

羅江縣志卷八

邑人李調元兩村稿

北鄉下

龍神堂前明時古刹也在縣北三十里南村壩

已卯偕周尤廷士拔遊龍神堂並序尤廷德陽縣令周明府際虞次君也明府豐潤辛酉孝廉與先君同年去歲曾邀余至署為太夫人書七十壽屏故遣子來謝尤廷尙未弱冠少余一歲詩文敏捷非凡器也留連數日遍遊南村龍神堂諸寺得詩二首奉贈云禪林何處足堪投除却龍神少可遊花被客蟠根盡

斷碑

出竹儲人看笋長留不妨對佛同流酸且喜因僧得
酒菊可惜栢松官取盡荒山未便挽賢騶 君家豐
潤我羅江萬里相逢意便降敢謂文人今有二從來
國士定無雙翩翩真是佳公子濯濯來過淺陋那不
是蛩吟無好句龍文已讓鼎先打士技後中進士為滋陽令

博

士

邑

人

源溪張勳隸額

博

士

邑

人

竹溪冉延恩書口丹

得龍神容像殊為靈感土人迄今日為龍神堂
傳冠徒之諱法興者即其兄之孫繼興而徒則今
官氏子法中餘自萬歷乙酉冬以別
業歸自綿竹中清山道經小憩則見

按乾隆五十六年龍神堂住持寂慧掘出斷碑半
邊文字剝蝕可識者謹一百二字存之可以知創
建年月孫徒法嗣及龍神堂所由名

龍神堂古名觀音寺

李化楠觀音寺補修碑記烈士殉名貪夫殉財名可
殉而財不可殉也近世殉名者寡而殉財者衆此在
人情類然而錙流為特甚余嘗論釋子能參禪悟道
吐棄一切者上也其次則不貪利不惜勞苦補修寺
院期於有成次也若逐逐於膾腥之場與庸夫俗子
爭多較寡風斯下矣觀音寺僧如永本平池僧教洪

法嗣因地屢易住持禪宇廢壞墻垣坍塌左右檀越
言極不忍爰商同衆姓延請如永與其徒常文居住
永自到寺至今中間不過十年而西廊之朽者重新
東廊及前殿之圯者改換山門三間禪房一所買水
田三十二畝添供香火築磚墻週圍塑靈官於門樓
栽竹栢於隙地今又改造正殿另塑大佛三尊凡此
如永師徒自爲捐貲修建並未叩及十方也寺自兵
火後妙空禪師剏於康熙初年其後三傳而絕安縣
僧如善繼居之募建西廊不再傳而亦絕非永師徒
相繼鼎新則妙空禪師所建造幾何不復化爲灰燼

耶吾聞有不世之功者必享非常之報今如永之建
豎如此子孫自此其與乎抑亦可以愧僧之貪利而
不饜垂死訖無一成者也

龍神堂有文昌宮先君石亭公新建人呼中梓潼額有
文教光華四字余童子時書

李化楠新建文昌宮碑記文昌之宿在奎璧之次主
文柄而帝君之尊配武曲厥祀遍天下於吾蜀尤謹
蓋靈異之跡明而爲人幽而爲神切近昭著俱可徵
信者莫茲土若也羅江距梓潼不出二百里以實沈
主參臺駘主汾之義例之則山川星辰民所瞻仰於

是焉在又非止文字之行世若水之行地無往不在
宜人人不忘其所宗主而已也羅江縣北之三十里
曰河村有山名月峯上起文昌宮而余之家在南村
與河村隔一水當二月三日帝君降誕則兩村之人
及附近各村並走相與焚香祝獻優伶歌舞以爲樂
辛未之春南村人與本村得所爲龍神堂者中有聖
像一尊第渺小乃思斤其楹而新之改故像而大之
旁爲天龕爲地啞余需次家居質贊其謀其夏卽上
京謁選至壬申三月而落成龍神廟者取其址而已
鳩工伐木棟楹梁檻皆更爲之墻垣門戶極堅好四

壁圖畫煥發精采又雕刻神龕一座神像裝設俱如
創始所謀者合前後所費共八十餘金皆出衆力所
贊襄自是凡遇會遂不必更至河村而自成南村一
勝地余惟文昌尊神一方文運所關不厭家祀戶祝
又况吾鄉第願鄉之人嫻於帝君孝友訓以事其父
兄以教其子弟歲時祠祀進退雍容都雅無長其豔
凌好勝之習以漸進於敦龐而又嚴爲戒飭求所以
有始終者是則可書也已

又文昌宮惜字宮告成賦十五韻代序奇偶起文字
書契易結繩爾光浮蠹簡栗尾染溪藤象形並會意

聲音點畫增五經昭雲漢六書寶光凝大道於斯在
斯文所由與何乃世間人曾不知欽承踐踏及拋棄
相習以為恒不知聖人典曷觀奉佛僧盥手誦經女
齋沐常服膺殘編與故紙珍惜凜戰兢誰歟計及此
劉子一念與家弟與之借石宮起七層其光看射斗
火色上飛騰是字皆可惜無曰我不能君子求多福
多壽亦其徵

同善橋在南村李家灣東

又同善橋碑記善可同也不可獨也蓋獨則私同則
公獨則難為同則易舉凡為善者皆然而而橋為尤

著吾鄉素號醇謹父老子弟敦朴有古風數年來于
路之崎嶇者靡不治橋之傾圮者靡不修獨此地需
橋孔亟而闕焉不舉非人心不同亦事必以漸也甲
子冬吾鄉人一念經營眾志咸孚諏吉鳩工閱兩月
而告竣予惟世之有財者多矣然往往慳囊難破即
或間有施捨亦多惑於浮屠又或具為一事二三其
見築室道謀不能度德比義以相勉於善孰若吾鄉
之除道成梁不容已贊而眾人一心者乎雖然橋者
善之一端也由是而推廣之以幾於風清俗美型仁
講讓不獨父其父子其子而後謂之大同吾鄉之人

其不以此自足而共勗于道以永守此同善之風也
是則吾之所禱也夫

月波橋在南村李家灣西

又月波橋碑記南村有水源出蔣公堰在象鼻山
家堰以達於劉家河蓋里人之所資以灌田也水之
支流汊港甚多而居其中可以作堰宜洩者則曰大
溝溝濶不可踰而潴水之處又甚深非蹇裳可濟舊
有二橋久不治里人謀所以新之其解囊鳩工始戊
寅冬迄今年夏而二橋成橋之左右凡係小水之處
如所謂支流汊港者俱架石焉蓋舉其大不遺其細

詩曰履道坦坦不信然歟其一橋在龍神堂前舊名
飛龍今仍之其一橋初未有名今題曰月波蓋水勢
蜿蜒如龍其環抱之處形如半月故曰月波云

南村前有別業名曰困園前有小西湖

調元小西湖初成並序云余在通罷官每日思歸遂
見之夢夢中輒見南村屋左有荷花池池中樓臺掩
映醒問自川來者皆以爲田然不夢則已夢則如是
余心度曰得勿使化田爲湖後半生居於是乎果爾
得歸當成吾志自是不夢今名小西湖遂初志也內
鑿方塘外鑿堤一朝鑿破夢中迷不覺便有菰蒲長

纔種旋看竹樹齊十畝肥饒化魚鼈
白年浮沒任鳧鷖更移紅白新繁藕
要當西湖在屋四

又園園雜詠四首
園初築亦悠然地狹偏能結構
堅疊石爲山全種竹穿池引水半栽
蓮拈花偶笑人稱佛戴笠行吟自謂
仙曾到名山遊脚倦此生只合
老丹鉛獨坐園林百不思細觀物理
識安危鳥巢密樹飛方覺魚在深淵
躍始知甕面常留親漉酒案頭時有
自圖詩本非畢卓何妨醉莫怪長年
獨把卮老來意氣尙縱橫指點前賢
入品評未許陶潛稱酒隱肯教杜甫
占詩名好官市上優兼備佳客門中

弟與兄看透世情惟冷眼知予不是不平鳴
一年一度出遊遨多所枝梧少所遭
題壁草書驚太怪逢場作戲詫猶豪
不能酒却常求醉畧解棋偏自詡高
漢帖唐碑是知己歸來何惜校讐勞

署州尊潘邦和認齋見訪南村敝廬
四首琴鶴貽謀遠雲龍望氣佳几筵
新涕淚遊鈎舊生涯草色青迷路苔
痕綠上階高臺瞰四極秋意澹人懷
已陟萬松嶺還登萬卷樓泰山兼土壤
淵海納川流滴露晨光起然藜夜未
休古香如可挹欲去更夷猶才疎餘
短髮祿薄仗長攬自信心常逸人嫌
骨本凡問奇

探奧窈學語仰雕鏡勿屏門墻外因風惠一緘座
上客俱醉園中人獨醒鷄羣常混迹魚服欲潛形潺
外舟艣月京門頌福星主恩不遺舊名已貯金甌
車象山在商村本宅後縣北三十里調元父母墓在焉
不塋扁擔灣者遵父命也

先君誥封奉政大夫順天府北路同知石亭李公墓誌
銘

羅江在四川成都府之東北境本朝百餘年來儲
英毓秀登甲榜者自今順天府北路同知石亭李公
始公未弱冠爲各諸生試輒利辛酉膺選拔登賢書

壬戌捷南宮後二十年公長子調元繼之甲第蟬聯
爲羅江勝事矣顧嘗綜公平生始爲名儒後爲循吏
有不徒以科名貴者初公考充咸安宮教習不就
歸遠近學者多宗之及辛未之官浙江癸酉補餘姚
令姚邑賦重民頑奸究出沒公親督搜捕創立枉生
所捐俸給食扁使目新擇執藝人爲之師量所執大
小暫借官錢資乙藝旣成乃保釋之使自謀其生人
咸悔悟終身不復作賊值歲歉公先期稽審戶口實
數以備賑卹上官入境爲口講手畫某里某甲如數
指上文無苗髮爽丙子調秀水移署平湖積案三千

有奇公自立程限每日分晨午甲三時訊之時各數
事三月盡理令洞開門庭任人觀聽有未愜衆心者
咨詢得實立時更定先是乍浦多賊公至捐俸設局
教之藝如餘姚之法甫兩月復秀水任民間有七年
雲烟兩月青天之謠巡撫楊公廷璋諗公循卓以知
府薦尋丁父憂庚辰進秩司馬署滄州牧州爲四方
盜逃淵藪公嚴保甲法稽覈部內丁男年貌按冊搜
索鮮脫者改署涿州州方患旱得旨賑卹公嚴胥
吏侵飽捐俸煮粥加賑民賴以安癸未補天津府海
防同知抵任復憂歸丙戌署霸冀兩州牧丁亥補宣

化府同知駐新保安境亦多盜立查更法以小紅旗
三十二半爲守旗半爲望旗初昏給邏卒守旗夜分
更給望旗天明必以望旗驗傳析中宵不輟由是好
宥屏路戊子調順天府北路同知兼署密雲事值有
冤獄公會讞得情將力雪之是時天子秋獮於木
蘭行在樞府以微來提勘留不發幾挂吏議旋經
寬免上廻蹕時日公于道左曰爾爲李化楠否可
謂強項令矣其有定識定力守正不屈如此公爲人
狀貌雄偉氣度豁達勇于赴公爲政寬猛相濟然一
以愛民爲主不輕勾攝曰堂上一點硃民間一滴血

所在約束吏役。維嚴公事或需車驢，應以吏役家所有而厚償其值。緝則不藉捕役，令鄉保里正報所知者，擒送簪花詒樂以旌之。讞獄不事刑求，使盡其情。虛衷以聽之精，算法凡丈量倉儲，彈指間盡得其數。性介潔絕嚮遺，如浼每監視鄰境工程，粒粟不擾。人亦不受一錢。其在浙之餘姚也，兩充壬申丙子鄉試同考官。立姚江書院，延壬申所得士李君祖惠為山長，李故宿學，馳聲文苑者五十年，得出公門，冠榜首人，咸服公之精鑑。平生孝友，任郵力於為善，期積一累萬，顏其居曰萬善堂。每曰：白日莫閒過，必多作。

有益之事，庶不負此光陰耳。喜藏書，以川中書少，購諸江浙，航于家為樓貯之，曰此吾宦囊也。工吟咏，熟韓蘓全集，覆按不失一字。善騎射，設堞百步外，每發必中。家居亦習射于圃，曰此運筦意也。公子調元與誥同舉春官，嘗述公少時承庭訓極嚴，不當意輒使之耕，不令入塾，耕少惰即投以瓦礫，以故公頰有傷痕。而公仍私挾策于隴上，據高阜而哦，乃使卒業。又垂髫時與羣兒戲，公自為官，兩兒設為兩造，有狡黠者不以理訴者，變色扑之。羣兒卒輸情受杖而去。識者知公他日必為名儒，為循吏。今公之歿也，以痰疾陡

作倉卒不能救抱長材而未竟所用良可哀也已公
姓李氏名化楠字廷節號石亭有名厚者始卜居羅
江縣之南村壩爲公會祖祖名攀旺父名文彩並
公貴贈文林郎浙江秀水縣知縣妣俱儒人文彩
三子次化榿監生化樟諸生公其長也生於康熙
十二年閏六月十四日午時卒於乾隆三十二年
二月三十日卯時享年五十有七原娶羅以子調元
貴贈恭人繼娶吳封恭人子三長卽調元癸未進士
由內閣中書補國子監學錄翰林院庶吉士吏部文
選司主事次譚元國學生次聲元爲化榿後孫二朝

礎朝礎

一人孫女三諸孤于公歿之明年奉喪歸

川又閱

長君以歷任廣東主考學政直隸通水

道歸乃

塋于車家山之陽命其弟太史李鼎元

以狀來屬誥文其壙石納諸幽而系以銘曰育民以
仁如穀斯活植民以義如莠斯拔應卒彌裕任重不
折轉石志堅餘泉品潔書澤遺愛銘詞徵實佳城千
祀永保貞吉 賜進士出身誥授光祿大夫經筵講
官戶部尚書協辦大學士總理刑部事軍機大臣年
眷姪富陽董誥頓首拜撰

羅恭人墓在桑家菴西去縣北三十里有墓誌銘

羅恭人係誥封中憲大夫順天府北路同知石亭李君元配也父兆鰲世爲羅望族石亭父英華君以羅本髫齡交又衡宇相望稔知恭人賢淑遂委禽焉時李君爲德陽諸生以貧乏多館於外後又改設爲羅江縣爲邑令上元王嘉會明府所器延至署教其子而親授以科舉文故數載不歸恭人事舅姑輒以身兼子婦職凡井臼操作無不備極辛勤至今人稱其孝並無閒言卒時享年二十八姊妹二人母居長二姨爲國子生冉子建之妻卽舉人冉玉嘉之祖母也卒時長君調元方六歲止有一妹甫三歲乳名蘭

伶仃孤苦毫無知識嗚呼可哀也已後二十歲長君始舉己卯賢書癸未成進士改庶吉士授吏部主事陞員外郎兼翰林院編修提督廣東學政乃得封贈焚黃焉閱二年爲直隸通永道相晤於京乃求銘於余有子如是恭人可謂不死矣恭人生於康熙壬辰年六月初六日辰時卒於乾隆己未年九月二十五日亥時塋於後山之陽乃爲之銘曰焯焯世閥奕奕儒門懷珠蘊玉篤啟後昆巍巍兆宅矗立南村蒼松翠栢霞護雲屯綿綿科甲世廕代興 賜進士出身誥授光祿大夫經筵講官戶部尙書協辦大學士

總理刑部事軍機大臣年眷姪富陽董誥頓首拜撰
象鼻觜五顯廟

調元五顯廟記五顯之名佛典以為華光菩薩所化
然不見於儒書惟明祝允明所著集畧有五顯記
祖殿靈應集言與天地同本始逮唐光啟降於婺源
王瑜家言當血食於此於是建宇棲之宋大觀以後
累封王秩宣和始封五顯總功郎胡升作星源志則
疑會要不載而推本於五行五行者象於天為五緯
形於地為五物麗於人為五德又名五帝即所謂太
昊炎帝少帝嚳黃帝其神即勾芒祝融蓐收玄冥后

土也小宗伯既兆五帝於四郊後人又為五專祠於
世始此義歟論頗近雅據此則五顯正神其來舊矣
南村上流瀟江有山迤邐而來直挿江濤曰象鼻觜
厓上舊有五顯廟未知何代額廢嘉慶元年二月綿
竹民某患瘵病百醫不治有雲遊道人於袖中探一
紅丸使吞之曰得此可除依方服之果痊以金帛謝
之不受問其姓曰蕭問其居曰象鼻觜後至山下訪
之遍問無姓蕭者有父老沉吟久之謂某曰兒時曾
聞祖父言山舊有五顯廟曾覽三教源流五顯父為
蕭永福一胎五子俱以顯為派以聰明正直德為名

而顯德居五尤著靈異能降妖安民故後人祀之其始是歟某乃登山遍閱見有小土廟以筊卜之其應如響遂捐金立廟而並塑觀音像於中據此則五顯非虛也故記之

象鼻嘴在縣北四十里有餘慶橋

安縣界

李化楠餘慶橋碑記善不足以濟則非善願以一人濟衆人其勢將立窮而以衆人濟衆人其事恒易舉古者杠梁之設督之在官歲一新之以便斯民然而窮鄉僻壤山巔水涯非能一一而杠之梁之也故以民勸民而梁之成也忽焉凡以勸有濟而已象鼻嘴

者綿安接壤也北走神泉南通紋水往來行人絡繹不絕中有一澗雖非巨流而自夏徂秋河水泛溢拾舟子而無從欲褰裳而莫濟隔岸相呼不無咫尺天涯之恨甲子歲吾鄉人侯等一念經營首倡盛舉募衆捐貲架以石橋是役也費約百金工匝一年自今告成以後履道坦坦乘輿者有按轡徐行之樂徒步者無淺深厲揭之艱濟之衆矣善莫大焉易曰積善之家必有余慶吾知諸君子之好善必有以獲其祥矣故以餘慶名橋而爲之記

石亭文集

象鼻嘴地居羅江縣上流凡縣中之田皆資灌溉

澗水本郭家溝山溪小水縣民跨水作羅漢塲下流入中江名澗江東北由龍安之石泉縣三面山發源名龍安水東流入安縣境由臭水河至塔水橋經彰明縣境至縣北二里許北寺前與瀾水合流雲龍堰易家堰子堰皆澗水也

馬家塲有野壩堰縣北四十里上接安縣大河水灌河村壩田五千三百畝

蔣公水有堰引水灌南村壩田二千畝零

毛家水有堰縣北三十里自象鼻角下流過河南一村灌毛家壩田

以上俱舊縣志

南村有寶林寺寺有仙人掌鐵幹森梢開花如芙蓉

羅江縣志卷九

邑人李調元兩村稿

人物有傳三人

一 明羅江舉人 一 雍原

永樂甲午

二 陳良翰

宏治甲子

三 高節

正德辛卯

四 吳瑛

正德丁卯

五 鄭泗

嘉靖癸卯

明羅江進士 一 陳良翰

宏治十八年乙丑 顧鼎臣榜

高節

嘉靖十一年壬辰 林大欽榜 題名 碑載 羅江 民籍有傳



高節綿州羅江人見題名碑簡弟嘉靖十一年壬辰進士及第第三人授編修署員外郎三十三年甲辰命太子賓客禮部尚書兼翰林院學士張潮左春坊左庶子江汝璧爲考試官以節與修撰茅瓚編修沈坤彭鳳歐陽煥等同充房考時潮入貢院三場畢以病死考試惟江一人而後序則屬同考修撰茅瓚是歲取中瞿景淳等廷試賜秦鳴雷瞿景淳吳情及第而少傅翟鑾二子汝儉汝孝俱與焉少傅以嫌故辭讀卷不許既試以進卷呈上上疑汝儉等在首甲因抑第一卷至第三復抑第三卷置二甲第四折卷果汝孝也刑科給事中汪蛟王堯

日論劾少詹事江汝璧修撰沈坤編修彭鳳歐陽煥署員外郎高節朋私通賄大壞制科大學士翟鑾以內閣首臣二子汝儉汝孝既連中鄉試又連中會試若持券取物然崔奇勲乃汝儉等師焦清與汝儉結媼又同受業四人者會試俱一號汝儉汝孝奇勲皆彭鳳所取詩同考官五人何俱在鳳一房歐陽煥亦汝儉等師本同經又改看書經跡若引嫌而陰助鳳尋卷及沈坤之取中陸燁高節之取中彭謙汪一中皆以納賄故有一鑾當道雙鳳齊鳴之謠乞明正其辜且欲追順天鄉試主考秦鳴夏蒲應麒阿奉翟鑾之罪上下其意吏部都察

院從公參看鑿隨具疏自理且請特降題目命部院大臣覆試上怒曰鑿被劾有旨參看乃不候處分肆行擾辨屢屢以真無假爲辭同夏言禁坐轎止罪一人全不感懼敢以撰科文贊元修爲欺朕內閣任重不早赴以朕不早朝並君行事二子縱有軾轍之才豈可分明請用恣肆放僻如此部院其參閱治罪不許回護部院覆請下汝璧于理嚴究分別情罪輕重上以跡弊明顯大壞祖宗取士之制遂勒鑿並汝儉汝孝奇勲清及鳳喚俱爲民汝璧等俱下鎮撫司逮問已法司會訊謂汝璧鳴夏應奇雖各阿取輔臣之子然實非賄故坤之取煒

節之取一中亦然獨彭謙實以校尉張岳賄五百金而中監察御史王珩沈越失於糾察罪亦難逃疏上詔杖汝璧鳴夏應麒六十革職閒住永不敘用珩越降一級調外任節岳充軍謙爲民坤一中煒存留供職出弁州別集科初嚴嵩之入閣也鑿以資格居其上權遠出嵩下不平而嵩終惡鑿不能容御史趙大佑劾鑿私同年吏部尙書許讚亦發鑿請屬私書帝皆不問會鑿子汝儉汝孝連捷鄉試會場嵩屬汪蛟王堯日劾其有弊鑿遂獲罪見史翟明鑿傳而節亦牽入嵩所屬劾中遂敗贊曰明世綿州三高齊名皆以文章著科名亦相埒而

出處畧異高第以詩人自命恬退自得嚼然不污可謂
明哲保身矣高簡雖廷杖遭謫旋復起用亦以晚節自
修惟節以鼎甲開吾羅爲明三百年所未有然竟以科
場事充軍實志以沒衆論惜之然當嚴嵩撓權之時朝
紳無不受其屠毒其事起於嵩傾翟鑿而牽連被害則
其不附嵩可知矣受賄之事莫必其有無得無亦如魏
忠賢誣熊廷弼行賄以陷楊左諸清流乎小人之害君
子何所不至識者察其原委而諒其心可也 童山文集
嘉靖壬辰科是年館選凡兩度以後選者改入平湖人
王梅前後皆與焉凡二十一人館元爲呂懷碑作恒建

拜給事蓋用前二科袁表唐順之例末名兩度俱郭希
顏反留爲史官時留者七人而主事至九人皆首揆永
嘉意也首甲狀元林大欽年二十二授官尋以酒色亡
第二孔天胤以王親出爲提學僉事終於外僚第三高
節授編修而不免遣戍其吉士中受極刑者二人一爲
胡守中其一卽郭希顏 野獲編

本朝舉人

一 余昌宗

順治庚子

十 曾世

山 嘉慶丁卯

二 李化楠

乾隆辛酉

三 李調元

乾隆己卯

四 錢林虎

乾隆庚辰

羅江縣志

卷九

四

五 柴邦直 乾隆乙酉浙江仁和人籍

六 劉清 乾隆戊子

七 李鼎元 乾隆庚寅

八 李驥元 乾隆丁酉

九 李本元 乾隆丙午

十 曾昌曙 乾隆己酉

十一 李朝壇 乾隆乙卯

十二 冉玉嘉 十楊上珍 俱嘉慶庚申

十三 余人鳳 嘉慶辛酉

本朝進士李化楠 乾隆七年壬戌金甌榜有傳

李化楠字廷節號石亭羅江人乾隆辛酉選拔鄉試壬戌進士狀貌魁梧奇偉分發浙江巡撫黃廷璋一見即器之謂司道曰此將來浙中第一循良也以是上官俱矚目癸酉補浙江餘姚縣令姚邑濱海自上林至闌風七鄉通錢塘橫亘八九十里時有海潮為患十五年秋七月颶風挾雨大作吹瓦拔木三晝夜不止公戰慄跪庭中祝曰海地窮民甫離災難若天不降康堤潰水溢民其為魚水旱頻仍罪在長吏願身受罰為此地民暫延殘喘祝畢即分役查看水勢天明廟山巡檢俞連馳報水幾潰隄賴東南風大作潮竟不至人皆以為公至

誠所感云姚邑賦重民頑爲盜賊出沒之藪公銳意廓清懸賞格追比一時小賊多擒而巨猾依然漏網因思緝權不可專委捕快因密錄難獲猾賊四五人名於票夜喚皂隸李兆民壯妻恩至署出票袖中面諭之曰賊某等現藏某所爾若依限獲受上賞否則革役二役唯唯退不三日積賊景三擒至內外無知者又十餘日逸賊張子顯張文紹陸通儒鄒士元繆九年孫善平等先後就擒審出屢次行竊及賄囑勢豪州同楊某串捕鹿縱各實情通詳分別軍流抵罪重賞兆恩二役合邑驚以爲神乃將小賊剝立枉生所捐俸給食扇使自新擇

執藝人爲之師量所執大小暫借官錢資之藝旣成乃保釋之人咸感悔終身不復作賊丙子調秀水移署平湖前令積案三千有奇公自立程限每日分辰午申三時訊之時各數事二月盡理去之日平湖民送者萬人頂香跪道以灰塗壁寫七年如雲烟兩月見青天二旬大街小巷皆然七年謂前任平湖令瞿天翔也楊公廷璋諭公循卓以知府薦尋丁父憂庚辰服闋進秩司馬署滄州牧州爲四方盜逃淵藪公嚴保甲法稽覈部內丁男年貌按冊搜索鮮有脫者署涿州州方患旱公捐俸煮粥加賑民賴以安癸未補天津海方同知抵任復

以憂歸丙戌署霸冀兩州牧丁亥補宣化府同知駐新
保安境亦多盜立查更法由是奸宄屏跡戊子授順天
府北路同知兼署容雲縣事是時京師奸人剪辮髮者
蔓延數省無佐證北路有張乙者爲警人誣告公知其
冤而 行在慮囚甚急公以獄讞未定拒不發已挂吏
議旋經大臣察其實奏請寬免事始解 上行圍木蘭
公葡伏道旁 上笑謂扈駕諸臣曰這個大漢可謂強
項矣人謂上有嚮用意卽大府益倚重公密雲令任某
以事被劾公獻得實矣有齟齬公者力持之而公素肥
碩令浙時痰常上迷至是又患怔忡祀竈日以事過都

門購參餌自隨越二日入會城命從者瀾茶忽解所佩
刃自傷茶至從者驚相呼公躍然起曰吾安得血被手
耶創未深然亦竟不治聞者皆詫嘆後任某卒以贓置
重法而力持者亦得罪戍邊衛以去人以是服公神明
云著有萬善堂稿石亭集醒園錄子二長調元賜進士
出身改庶吉士授吏部文選司主事甲午廣東副主考
陞考功員外郎兼翰林院編修提督廣東學政請封中
憲大夫官至直隸通永道二譚元太學生
贊曰公以壬申校浙聞得沈君祖惠爲解首儒林多稱
之要其獲上治民不愧古循吏矣疾由心作天若甚之

然君之沒未幾而忌君者旋以他事敗密獄亦卒如
 公所讞報固若斯不爽也抑亦可以無憾矣年任侍郎吳省欽撰
 調元字美堂號雨村十八歲補諸生即隨先君浙江秀
 水任讀書因在籍食俸大司寇錢香樹先生家居金陀
 坊時至衙署先君呼出拜見以素所作詩文請質先生
 驚曰公子殆非蜀人乃吾浙人也可受業吾門吾當教
 之然吾門生多大老汝遙以吾兒少寇汝誠為憐而呼
 余為太老師可也自是在金陀坊受業一日見先生命
 諸公子擬作召試詩題春蠶作繭先生命同作調元得
 一聯云不梭還自織非彈却成圓先生閱之大喜曰此

名句也當為諸卷之首又復批於卷曰憶昔十年前侍

上于 乾清宮元宵聯句 上思如湧泉言言珠玉

僕得一聯云風團謝家絮霜點洞庭橙一時王公大臣
 俱推僕為五字長城固不敢當今見足下圓字一聯與
 前事堪印証也他年成進士入翰林聲名雀起予企望
 之從此以詩學受知於先生春風中盡丁丑一年明年
 戊寅隨先君以艱回蜀從此不獲侍左右然至今未嘗
 忘也又受知于提學洗馬史公屢試第一謂諸生曰吾
 在蜀三年今始見一個秀才也即日送入錦江書院肄
 業中已卯鄉試第五名辛巳由落卷取中內閣中書補

國子監學錄癸未會試中第二名進士殿試第二甲第
十一名改庶吉士散館授吏部主事考差第一充廣東
副主考回陞考功員外郎丙申以議稿塗押爲同司所
回舒爲先入所中填入浮躁引 見蒙 上詢及軍機
傳吏部堂官明白回奏尙書武進相國程文恭公以畫
稿塗押對 上曰司官有不安于心者向例原准不畫
押如何便填大計程曰是 上問居官何如奏曰辦事
勇往遂奉 旨着仍以員外郎用卽日到任未幾員外
尙未補缺卽 命提督廣東學政三年任滿回京卽授
直隸通永道召見勤政殿 上曰 汝乃朕提拔之人

也非朕乾剛獨斷尙在明朝汝能免權臣之害乎汝須
謹記朕言在部數月 上嘗從容謂相國程文恭及侍
郎袁清恪曰李調元能與舒阿爭稿頗有骨氣但性子
不好須令改之乃終不自檢在道任甫二年又因參永
平府爲府所傷遂罷職遣發伊犁以母老贖罪不作出
山想後 上問弟鼎元李調元是汝何人蓋 聖恩猶
在念也然時和方當國遊其門者成羣豫知永山必敗
不肯復謀補官遂毅然而歸豈知家居十八年永山始
敗可以報國而吾亦老矣以邊省之人而受 高廟
特達之知如此其重誠爲千古罕有終不能勉力向上

每一念及惟有淚潄潄而已聊書于此以示後世子孫
世世以報國爲念無令我長抱終天之恨也

李鼎元字墨莊由廩生中庚寅鄉試戊戌會試殿試第
三甲第一各進士改庶吉士散館授翰林院檢討改授
內閣中書己未八月十九日 命李鼎元至琉球國偕
正使太湖趙文楷充冊封天使賜正一品麟蟒服庚申
過海辛酉春回朝復 命陞宗人府主事

附鼎元琉球異夢記

詩有夢中得句者率多懞恍難解然竟有卒得其解
者余弟墨莊戊午八月十九日奉 命冊封琉球紀

恩詩有廿年舊夢肯迷因句自注云甲辰九月以假
遊浙夜夢過海作詩覺而忘之惟記有雲養淡螺深
句頗自得意而未得其解余讀之亦覺茫然欲查典
故而書樓已燒無可校正今年壬戌六月二十五日
冉錫玉嘉自京回墨莊抄寄所作右旋白螺記云右
旋白螺者西藏入貢供器也乾隆丁未春 上命大
學士福康安勦臺匪林瑛文 賜此螺時余方在翰
林修國史得恭讀 高宗純皇帝御製右旋白螺贊
謂微物而能測天攜以過海吉祥安穩心竊誌之後
數月捷音至言舟行往來順利此螺遂奉 旨留貯

閩督署備渡海用嘉慶四年己未琉球國王尙温以其祖尙穆喪來告請襲封例遣使余時官中書適在選八月十九日引見得 旨貳修撰趙文楷以行庚申二月出都四月抵閩中丞汪公志伊齋螺至云 皇上命督臣王德奉許供奉封舟乃望 闕謝訖啓 鑰審視螺長五寸六分參之數得天地之中和圓腹混沌象太極首尾各長二寸象兩儀旋四折而止象四象螺皆左旋此獨右者以陰承陽迎天行也膚嵌寶石八合八卦數色配之襲雲錦五重重一色取五行相生義所以養之也藏以金匱而無極之理備焉

蓋造物者生是非偶也先是乾隆甲辰余假歸九月四日泊舟温城下夢航海樓船巨麗旗幟飛揚風浪拍天擊節爲詩醒記雲養淡螺深句前舟牌書免朝字舉以問人無知者以夢也置之及使命下檢同鄉海山先生琉球志畧封舟圖有免朝字已驚前夢驗豈復料白螺之 命能使十七年夢中之句字字有着落哉五月七日自閩開洋十二日抵中山十月二十五日自中山開洋十一月朔日歸閩去來皆六日竊惟琉球自前明迄今册使往來三十有餘次往往中流猝遇颶颶傾圮折甚者觸礁破舟此行獨邀

順利與福公後先一轍謂非白螺之神曷克致此五
 燈會元謂廣南有鎮海明珠者殆此螺之類歟並寄
 接到白螺恭紀二首卽以夢中句爲起句云雲養淡
 螺深居然夢可尋光華瞻日月靈異測陽陰定海風
 癡避降龍佛法欽波濤知不起止水是臣心雲養淡
 螺深光涵八寶沈賄霞囊是錦捧日置爲金已佐將
 軍績重煩 聖主心不才叨異數何以靖微忱夢之
 足徵如此前因之說信不誣也誰謂不可解乎
 補遺

李驥元

乾隆甲辰殿試茹芬榜有傳

李驥元字其德號鳧塘羅江人生不好弄天性愛書甫
 四五歲見羣童入塾卽跟隨不回父香如尋歸問之則
 曰我亦欲讀父曰汝能識字乎對曰先生教彼認書我
 從旁聽之十已記其八矣試之果然父奇之遂留自課
 南村有龍神堂在大溝北中有文昌宮每年二月初三
 日誕會演劇闔村士女無不聚觀弟獨絕跡不出父憐
 其體弱恐勞瘁成疾詎令出觀不得已隨去隔溝而望仍
 挾一書且看且讀及父至劇場回視之則已回塾矣人
 皆以爲異時戊寅余隨先君自秀水丁祖妣艱歸先君
 命余在環翠軒課弟譚元而香如叔亦令鼎驥兩弟從

學舉業惟弟年幼苦讀未弱冠而文已如成人然是年
值羅江彙童滿擬縣覆居首未幾榜發則見驥一人回
問之哽咽不言淚如雨下乃知首覆無名因慰之曰觀
汝志氣如此必不久居人下也次年卽由縣州院連取
三案首入庠學憲南淮吳冲之愛其文深器之弟初名
繼公親筆改爲驥曰汝千里駒也勉之自是歲科屢試
第一丁酉遂入選拔中鄉試第五名經魁余時亦提學
廣東聞之喜曰此可繼先君及余之故步也次年戊戌
又聞弟鼎元中進士以三甲第一名改庶吉士又喜曰
此可繼余館選之故步也是科弟雖未第而鼎投館得

檢討家聲由是日起人皆榮之余曰未也須得編修乃
慰我心耳必得者其在驥弟乎又三年余由廣東學政
任滿回京補授直隸通永道因接二弟在署甲辰會試
余與鼎住內城看榜見四川進士額止二名弟與巴縣
張錦與焉一時榜下譁然曰皆讀書種子也我輩第第可
無恨矣殿試二甲改庶吉士後三年散館竟得編修于
是三翰林之名噪天下大總裁兵部尙書獻縣紀曉嵐
先生謂諸王公曰吾今科所取皆讀書人而首推者實
雨村之弟驥元也吾昔皆二甲未得編修今不缺矣成
吾志者子也時香如叔亦自山東泰安令弟婦兄何人

麟署聞信回京相見於通歡燕竟日余時亦將歸里臘月初五爲余誕辰弟曾作詩二首祝壽餞行送至葫蘆頭各灑淚而別丁未兩弟丁叔父艱始得回里相見然一自楚北來一自粵西來雖喪費稍支而萬里千山風塵碌碌已苦不可勝言矣居半年惟與父老閒話及麻絕口不談溫室樹生平不喜應酬在京亦不多赴燕會來川典試編修溫汝适順德人爲會試同年榜後道過羅江見訪已行至祠堂蓋欲兼觀醒園也弟既不迎迂亦不脩餐溫悵然而去後吾弟聞之若不知也服闋至京此後遂與弟不復相見矣次年適值乙卯科各省鄉試

考差得頭等蒙 恩差與太常寺卿施朝幹充山東副主考回京復 命 召對稱 旨問家世甚悉 天顏大喜未幾卽陞左春坊左中允蓋超陞也人皆以爲簡在帝心不日將大用王公及掌院等交相薦舉戊午大考雖照例仍改編修每逢站班常被 顧問尤爲成親王所器賞是年二月二十三日奉 特旨派入 上書房行走除夕蒙 上賞賜貂皮等節物隨詣 公門叩謝已未年五月初三忽得咯血之疾始猶勉強上朝因誤服涼藥遂至不起蓋弟一生讀書之心血至此而盡雖身刻清華而骨體已枯故臨死而猶不自知也

弟工於小楷每以趙子昂為法作文簡古似韓柳尤工於詩立意學蘓數年前曾以鳧塘稿托余婿張玉溪寄余求序其詩亟為少司寇王蘭泉先生所賞序成寄墨莊為刊行不知刊成否弟天性孝友兄弟和睦從不聞家人生產故至今同居無閒童氏張氏生有二子長子五歲次二歲俱於弟卒後一年天殤竟無子其存惟張氏所生一女而已弟生於乾隆乙亥年七月初二日寅時卒於嘉慶四年己未九月二十二日寅時年四十有五

贊曰昔王沂公夫婦積德無子每夜禱天願賜一愛讀

書子後夢神人送一子謂曰今以曾參為汝子後生兒遂名曾今弟之好讀母亦天所賜歟雖非三元宰相而馳名翰苑幾二十年叠膺 帝眷可謂深矣乃年止中壽沒竟無子亦又何哉豈天能生之而不能成之歟抑其稟氣之厚薄有以使之然歟嗚呼天道無知真無知矣

兄調元撰

本朝副榜 一 郭大有 乾隆辛酉

二 陳德 乾隆己亥 譚有容 嘉慶戊午

本朝拔貢 一 趙亮 雍正乙卯

二 李化楠 乾隆辛酉

三 李驥元 乾隆丁酉

四 計國成 乾隆己酉

本朝歲貢 嚴秉剛

二 陳 註

三 范 昂

四 陳 策

五 石維嶽

六 陳格言

七 冉 府

八 謝周望

九 計萬安

十 計天禧

十一 鞏建昌 計李朝杰 恩貢

十二 陸士彬 計陳懷瑀

本朝武舉 一 李應宿 二 張書綸

三 謝應元

四 李彥青

羅江縣志卷十

邑人李調元雨村稿

節孝

宋節孝張氏羅江士人女其母楊氏寡居一日親黨有
 婚會母女偕往其典庫雍乙者從行既就坐乙先歸會
 罷楊氏歸則乙死于庫莫知殺者至名提點成都府路
 刑獄張文饒疑楊有私懼為人知殺乙以滅口遂命石
 泉軍吏劾治楊言與女同榻實無他遂逮其女考掠無
 實吏乃掘地為坑縛母于其內旁列熾火間以水沃之
 絕而復蘇者屢辭終不服一日女謂獄吏曰我不勝苦

毒將死矣願一見母而絕吏憐而許之既見謂母曰母以清潔聞奈何受此污辱寧死筮楚不可自誣女今死死將訟寃于天言終而絕於是石泉連三日地大震有聲如雷天雨雪屋瓦皆落邗人震恐勘官李志寧疑其獄夕具衣冠禱于天俄假寢坐廳事恍有猿墜前驚寤呼吏卒索之不見志寧自念夢兆非殺人袁姓乎有門卒忽言張氏饋食之夫曰袁氏明日袁至使吏執之曰殺人汝也袁色動遽曰吾憐之久矣願就死問之云適盜庫金會雍歸遽殺之楊乃得免時女死才數日也獄上郡牌其所居曰孝感坊

宋史

道釋

羅江縣道士譙又俊壯年忽夢太山府君追之賜以黃敕補爲杖直晝歸陽間夜赴冥府此二十餘年常說人間有命未終爲惡者追生魂笞之某人在陽間之病或貧乞是也往見親戚及里人被笞者明且往視之皆驗然恒願得免忽于冥間遇道士不言姓名謂曰爾何不致名者盡于陽間上告南辰北極必得免又俊依此虔告忽爾太山府君却追黃敕自是遂免因入道攻易年八十餘

太平廣記

技術

羅義綿州之南村人父兆鰲卽吾外公也生三子長超次玳三卽義也超玳皆慤謹獨義不治生產任狹仗義好奇術每爲人報不平二兄皆惡之幼時有老喇嘛至門求食義怒其臙臙逐之不應以石擊其額流血滿面喇嘛遂卧地號冤作死狀義悔扶至家厚待飲食爲謝前罪喇嘛曰無妨也速以水來義以杯覓水與之喇嘛咒水而自塗其痕頭皮如故義神其術出斗米求之遂密授其訣謂義曰此鐵牛水也以濟人則可不可以自利自利則不得其死也遂去鄉里有患跌折金傷者醫之無不立驗瘍瘡癰腫並能治之吾母吳太夫人患乳

巖火赤嫩竈竈食不進延義咒水噴乳便不知癩以佩刀割其腐肉遂愈又善金石變化之術以小石置杯中蒙以帕咒之卽成小銀錠先君石亭公庚午年授徒觀音寺寺前有陳五店共試其術始見蒲杯皆石去帕則皆銀也陳五以爲真盡納之懷中探之則又成石矣義笑曰此未爲奇也櫃筒有青蚨經我一搖則盡入吾袋陳五不信先出筒紀數復入始搖方聞響而筒空矣陳五甚急義出其袋笑曰錢在此也數之毫釐不爽先君奇之因延與飲嘆食無魚義曰可得也以紙醮水成二團投籠中則雙鯉碗在水中鱗鬣游漾似新出水者皆

曰烹乎義曰不中烹也傾之於地仍成紙團爲之術然
一日先君殺雞食義見曰何故殺生也以手逗其頸接
之咒畢雞復飛去其神異如此然義自有此術不畏刀
棍頗多持刃以爲能非數十人不可近或見斫傷卽以
水自咒平復如故前後傷人無數兩兄患之義曰我終
不以一人累兄也然旣嫌我我豈爲周處貽害鄉里乎
遂去不知所往癸酉先君宰浙之餘姚令余奉母買舟
由涪開程一日至重慶上岸登酒樓則義在焉問余曰
汝來時曾聞州中有人殺七刀尙活乎余曰不知也後
至酆都復見之並給予費別曰君去余亦歸矣後余官

京師聞義殺人前案發爲孫法祖所獲以印鉗其足夾
之幾斃置鐵牢中者屢年先是縣有甲首黃某者素見
信於孫多剝民膏脂以邀官寵鄉人呼爲黃虎義之殺
人而遁也經一年事已息矣黃知其歸密爲孫耳又暗
爲捕目故獲義以故恨黃刺骨逾年孫去赦出義百計
覓黃黃巧避之終不敢出己丑余自京丁父艱歸見義
於花街鎮蓋新移來此以舅故登堂拜之見精神如昔
而腳稍蹙問其故目光爛爛似大不平者後戊戌余服
闋補官提學廣東鄉人有來署所者告余曰義以去年
二月殺黃某於團堆之劇場屠割無全膚其殺黃畢亦

白殺余聞之始嘆喇嘛之言至此終驗也
贊曰怨毒之於人甚矣哉黃與義本無夙昔之仇徒以
身充甲首橫行鄉里助官虐民遂至身遭慘死可不鑒
乎殺一人而除一方之害義亦烈男子也哉

二產

桃花犬 淳化合州貢羅江桃花犬甚小而性慧常
擾于御榻之前每坐朝犬必掉尾先吠人乃肅然太宗
不豫犬不食及上仙犬號呼涕泗以至疲瘠章聖初卽
位左右引令前導鳴吠徘徊意若不忍章聖令諭以奉
陵卽插尾飲食如故造大鐵籠施素衲置鹵簿中行路

見者隕涕後因以斃詔以微蓋葬于熙陵之側

楊大年談苑淳化中合州貢羅江犬常循于御榻前太
宗不豫犬不食及上僊號呼涕泗以至疲瘠見者隕涕

參政李至作桃花犬歌以寄史館錢若水 方輿勝覽

翰林學士李至 字言幾真定人舉進士太平興國中

國子監真宗朝拜工部尚書知河南府卒作桃花犬歌呈修史郎錢侍郎
宋史錢若水傳太宗畜犬甚馴常在乘輿左古及崩號鳴不食周送承熙陵李至嘗咏其事欲若水書之以戒浮俗詩曰宮中有犬桃花名絳繪圍頸懸金鈴
若水不從

先皇爲愛馴且異指顧之間知上意珠簾未捲扇未
開桃花搖尾常先至夜靜不離香砌眠朝飢祗傍御

牀餽彩雲路熟不勞牽瑤草風微有時吠無何軒后
鑄鼎成忽遺弓劍棄寰瀛迢迢松闕伊川上遠逐龍
輜十數程兩皆漣漣似流淚骨見寒毛頓顛顛萬人
見者俱傷心微物感恩猶若是韓盧備獵猶足嘉西
旅充庭豈爲瑞聞君奉詔修實錄一字爲褒應不曲
白魚赤雁且勿書願君書此懲浮俗

古今詩話

宋王禹偁園林大賦嘉彼御犬旣良且馴蒙先朝之
乃眷向皇宮而託身有警蹕以皆從無起居而不親
繡組飾以煒煒金鈴奮而振振飼以公庖彭澤之魚
公會何足道畜之士性西旅之葵兮詎得同倫健隨

天步慵眠地茵效珍比夫異獸供命等乎邇臣若乃
風暖掖庭花繁禁禦扇侯錦翼之雉籠近雲衣之女
入赭袍兮曳尾聞霓裳兮率舞巡繞乎金塘徘徊乎
瑤圃睥睨爐烟追隨蠟炬見觀書于乙夜聽求衣于
未曙旣無吠乎投籤每夙興于曉鼓莫不默識聖心
潛知天語備指顧以弗迷奉周旋而見撫第晨遊而
夕嬉又安在乎逐麋而捕鼠彼宋狔之與韓獪又安
得同羣而接武者哉嗟乎事變人天時移今古秦皇
採藥島中之士未迴軒后鍊丹湖上之龍已去欠舐
鼎以登仙對遺弓而戀主卧錦薦兮罔安嚼鮮食兮

彌苦豐顛載減負重鋤而不勝病骨其羸求敝蓋于
何所赫赫顧命明明嗣皇念犬馬之微誠義存始卒
徵父母之所愛深增盡傷俾守園陵之地且殊槃瓠
之鄉縻索緝以璀璨珠籠檻而熒煌仗陪鹵簿車逐
輻輳鎖幽宮兮黯黯號白日兮茫茫松阡夜月栢械
曉霜依六尺之輿已成疇昔益一杯之土亦足隄防
表中天之巨痛甘朽骨於龍岡狡兔盡而見烹理殊
炎漢駿馬死而陪葬事類皇唐邈予生之介立荷太
宗之維繫叨澤宮之一第玷承明而三入耻懷祿以
不言維報君之是急胡薄命之多屯顧寸功而莫集

嗟白首于郎署慟梓宮而嗚咽生未得圓形烟閣想
英衛之難追死不當賜塋長陵豈蕭曹之能揖異臣
哉之可歌信龍也之罔及聊作賦以自傷寄毫端而

雪泣 小畜集

慶歷中衛士有變震驚宮掖臺官宋禧上言蜀有羅江
狗赤而尾小者其警如神願養此狗於掖庭以警倉卒
時人謂之宋羅江 東軒筆錄

馬馳李 李出馬馳寺樹高七八尺葉微小結實生熟
皆青灰色核小如米而甘脆一名青晚李


石瓜樹在馬馳寺正殿東廊堦下土人呼爲冬瓜樹樹


端挺葉肥大如冬青花似桑色淺黃實長不圓殼解而
子見見益部方物畧記又廣羣芳譜烏撒軍民府土產
石瓜樹生堅如石善治心痛今羅江縣有之
海紅豆紅豆出畧平小天台山遍地有之枝如木蓮葉
碧綠三月開花結莢莢內有豆如紅豆可作餠果春取
根下小枝移栽易活

附銅爵二

羅江縣北寺周士泰家中掘出明銅爵二高五寸上濶
五寸腹二寸脚二寸半以其亦係羅江縣土中掘出故
附記之使後人知有羅江縣故也

明銅爵二





調元銅爵詩并序云潺亭山下有八十歲老人周士
 泰掘出明之兩銅爵上有成化十八年羅江縣置九字
 予購得之並紀以詩云人間何處是滄桑生把他邦
 換此邦丁鶴歸來城郭變兩銅爵上見羅江

附刪誤舊志一條

按舊志西山觀設有羅隱木牌。不知始於何人。蓋羅隱曾有魏城逢故人詩。疑其亦遊于羅。故祀之。又因查不出搢紳以羅江爲雒城。始於何代。遂引羅江東集中有雒城作一首。其詩云。大鹵旌旗出洛濱。此中烟月似埃塵。更無樓閣尋行處。只有山川識舊人。早得鑄金誇范蠡。旋聞垂釣哭平津。舊遊難得時難遇。迴首空城百草春。觀其詞意。蓋客寓洛陽作也。古洛雒通用。故曰洛濱。與羅江。葢爾小縣全不相合。且此時五代分爭。十國各霸。前後

兩蜀為王蓋所據吳越王獨守正朔終身稱王故
江東暫依之何曾有腳跡入蜀中來祀羅人殆如
楊公周冕欲修金雁橋而先與漢州爭雒城也善
乎劉甲人物志序曰唐以前凡稱涪城即今綿州
也凡稱雒城即今漢州也如使雒城為羅江則朱
子綱目於建安十七年冬十二月大書曰劉備進
據涪城不應又于十八年夏五月復書曰進圍雒
城矣羅江去雒城七十里安知非中流矢後歸葬
於此乎羅江為涪分邑之地當時不過村鎮驛站
往來之所並未立有玉名自改設羅江縣後遂無

古名可稱搢紳出于京都琉璃廠書賈多係妄為
全不足據遂強安雒城二字以至仕宦者俱遵用
之此誤之又誤者也故不可不刪又大霍山乃羅
瓚隱居之所今人多誤為羅公遠則又走入唐明
皇月宮去矣然仙家事本屬荒誕可以不辨至此
事則讀書人明而易見者也不得不全刪之以免
貽誤後人言認雒城為羅江之號而並不引羅
江東詩人以為我羅江光寵也然則羅江古名當
何稱乎曰潺亭萬安皆可稱也何必區區與漢州
爭雒城也調元又記

雜城與羅江全不相知何以知誤辨至
此羅隱木牌想亦起於沈公修志時附會其說
今得吾師辨明刪除之闕者可以昭然露矣
受業冉玉嘉跋

維城與羅江全不相
知何以和也誤初至
此羅隱本勝想亦起於沈公修志特附會其說
今得吾師辨明剔除之聞者可以昭然
受業丹玉嘉跋

